

四庫全書

史部

欽定四庫全書

史部

山東通志卷三十一

詳校官監察御史_臣劉湄

檢討_臣德生覆勘

總校官知縣_臣繆琪

校對官助教_臣卜維吉

謄錄監生_臣繆瀛

欽定四庫全書

山東通志卷三十

仙釋志

二氏之學儒者所不道而百家傳記恒稱述之豈
其人盡侏僂而言皆荒誕哉蓋物與无妄心理皆
同大聖大賢明體達用操存涵養未嘗墮於一偏
而二氏以獨覺之知探無極之理求之不得甚至
捐親戚遺肢體而不顧迹其篤念本性以力持於知

誘物化之交者不可謂非志士堅苦之行也世俗
聾瞶鉞砭斯存其人其言有足採者正樂得而志
之若夫致虛守寂之說不足以經緯萬端元史作
釋老傳曰佛於晉宋梁陳黃老於漢魏唐宋其效
可覩矣洵有味乎其言之也作仙釋志

仙釋

舊志所採頗失之雜茲削其浮誕之說而取史
志中傳聞有據者增補之稍加別裁以云慎也

自晉以後仙前釋
後爲例各朝準此

周

白兔公

長白山人事吐納之術得長生神仙交感傳云是彭祖弟子常騎白兔往來如飛因稱爲

白兔公唐韓翃送齊山人歸長白山有舊事仙人白兔公之句

浮丘公

姓李嘗居嵩山修道與王子晉控鶴而遊所著有相鶴經今新泰縣有浮丘鄉邑志以爲

即仙翁故里也

涓子

齊人好餌术既其精至三百年乃見於齊著天人經四十八篇後釣於荷澤得鯉魚腹中

有符受伯陽九仙法能致風雨淮南王得其書有琴心三篇

秦

安期生

琅邪人老而不仕賣藥海邊始皇東遊請與語三日夜賜金璧值數千萬俱不受置於阜

鄉亭而去留赤玉爲報李少君對漢武帝曰臣嘗遊海上見安期生食臣棗大如瓜安期生仙者合則見人不合則隱

盧敖

燕人始皇時爲博士詔採藥海中東至合丘見一石洞口如斗遂匿不出辟穀導引世

謂之休糧洞
詳山川志

平常生

居穀城鄉數死復生時人不信後大水出一鄉被害平在闕門山頭大呼曰平常生在此

且云雨五日必止止則上山求之但見衣帔茅帶而已後數十年復爲華陰門卒

黃石公

張良狙擊秦王不中亡匿下邳遇老父坐圯上脫履圯下謂良取履良跪進之曰孺子可

教約後日會此出一編曰讀之當爲王者師後十年興十三年見濟北穀城山下黃石即我也後十三年

良從漢高祖過濟北果見穀城黃石乃取而葆祠之

漢

稷丘君

泰山下道士武帝時以道術受賞賜甚厚髮白再黑齒落更生後罷去上東巡泰山稷丘

君乃冠章甫衣黃衣擁琴來迎拜曰陛下勿上也上必傷足行數里左足趾果折上諱之封事畢命爲稷

丘君立祠

泰山老父

姓氏不傳武帝東封見老翁於山下道傍頭上白光高數尺怪而問之對曰臣年八

十五時衰老垂死遇有道者教臣絕穀但服朮飲井水併作神枕法臣行之轉老爲少日行三百里今年百八十歲矣帝受其方賜玉帛辭不受老父後入山去每十年五年一返鄉里歷三百年遂不復還

東方朔

平原厭次人武帝時仕持戟郎東郡獻短人上呼朔至短人指朔曰西王母種桃三千年

結實此兒三偷之矣又風俗通云東方朔太白星精黃帝時爲風后堯時爲務成子周時爲老聃在越爲范蠡能興帝王之業變化無常故以仙目之

崔文子

泰山人世好黃老居潛山下後作黃散赤丸賣藥都市會民有大疫文攤朱桴繫黃散以

狗人門飲散者即愈所活萬計

李少君

齊人受安期生爐火術貧不能辨漢武帝慕方士乃以其術上之言丹砂可成黃金金成

服之昇仙天子甚尊禮之賜遺無數帝前有古銅器少君言是齊桓公柏廕所陳帝驗其刻字果齊故器少君數百歲人視之如五十許面色肌膚甚有色澤乃作神丹謂帝曰陛下不能絕驕奢遠聲色殺伐不

止喜怒哀勝大道蓋未可成也以
丹砂少許與武帝便尸解而去

黃

公

東海人嘗佩赤金刀制御蛇虎如其意事見
西京雜紀今安邱有黃公墓其羽化處也

巫

炎

字子都北海人官駙馬都尉武帝出見炎於
渭橋其頭上鬱鬱紫氣高丈餘帝召問君年

幾何所得何術對曰臣年百三十八歲亦無所得詔
東方朔使相之朔曰是得陰道之術帝屏左右問之
對曰臣年六十五苦腰痛脚冷不能自溫又痺不能
行得此道以來七十三年今有子二十六人氣力如
壯時無所憂患帝曰卿有道不聞於朕非忠臣也對
曰臣誠知此道爲真然陰陽之事宮中不利臣子所

難言又行之皆逆人情故不敢以聞帝曰戲
之爾卒受其術炎年二百歲白日飛昇而去

抱犢子

承縣君山壁立千仞上有田數頃隱者王老
抱犢而耕遇異人仙去因名抱犢崗詳山川

志 按嶧縣志云抱犢子鄆人也少在黑山採松子
茯苓餌之且數百年時壯時老人乃知其爲仙嘗牽
黃犢過陽都酒家其女悅之共牽犢而走人不能追
後還復在市中數十年乃去見潘山下冬月賣桃李
云事見劉向列仙傳葛洪云
犢子鬻桃以淪神蓋指此也

鹿皮公

留川人少爲府小史岑山上有神泉人不能
到小史白府君請木工三十人作轉輪造懸

閣梯道成上其顛作祠屋因畱止其旁食葦芝飲神
水七十餘年溜水未下呼宗族得六十餘人命上山
半水出盡漂一郡小史辭遣宗族令下山着鹿皮衣
升閣而上後百餘年下賣藥齊市也世稱鹿皮公葛
洪曰鹿翁陟
險以流泉

園客

濟陰人常種五色香草積數十年服食其實
忽一日有五色神蛾止香草上客收而薦之

以布生桑蠶焉至蠶時有神女夜至助客養蠶亦以香草飼蠶得繭百二十頭大如甕每一繭繅六七日乃盡繅訖女與客俱仙去莫知所如葛洪云園客繅蛻於五車

孔安國

魯人常行氣服鉛丹年三百歲色如童子隱潛山弟子隨之數百人每斷穀入室一年復

出顏色益少其不入室則飲食如常與世人無異寶惜道要不肯輕傳奉事至五六年審其志性後乃授

之人物內
另一孔安國

王遠

字方平東海人舉孝廉仕至中散大夫棄官修道桓帝時屢徵不起使郡國迫載詣京師

詔問皆不答乃題宮門扇四百餘字而去所言方來事多驗帝使人削之其字逾顯

麻姑

王方平妹修道於牟之姑餘山語見續文獻通考今寧海州姑餘山一名崑崙山仙蹟具

存唐太宗東征軍至鄒平之昌陽鎮麻姑顯異運餉助軍軍士築臺表之今齊東之麻姑堂是也按圖經撫州南城縣有麻姑仙壇葛洪神仙傳云王方平過吳蔡經家遣人與麻姑相聞亦莫知麻姑爲何神也還報曰不見忽已五百餘年尊卑有序修敬無階觀此則仙蹟既非寧海亦並不言平之妹且方平桓帝時人降吳猶在晉前安得即云五百餘年耶附述以備博考

樂正子長

即墨人好道遇仙人授以巨勝赤散方仙曰服此藥老成化童子長服之年八十色

如少女子長受之入海登勞山仙去

夏侯臯

即墨人徐誕弟子勤修得道臯歿後有人過臯以手巾寄信與誕視之乃棺中物也見郡

國志

馬明生

臨淄人本姓和字君實少爲縣吏捕賊被傷死遇神人以藥活之遂棄職隨神周遊天下

遇安期生受太陽神丹經三卷歸入華山合藥不樂昇舉但服半劑爲地仙恒居人間不過三年輒易其

處輒轉五百餘年人多識之

唐虞

不知其人有道術莫知其歲後漢書云與華陀同時能道赤眉張步家居里落若與相及

語見華陀傳

王和平

北海人性好道術自謂當仙濟南孫邕少事之至京師會和平歿邕葬之東陶有書百餘

卷藥數囊悉以還之後弟子言其尸解乃恨不取其寶書仙藥焉

于吉

琅邪人精苦修道數見老君親授元旨吳孫策平江東將士多病吉啖水輒瘥策渡江襲

許與吉俱行時大旱策見將士多在吉所怒之遂收
吉縛置烈日中使請雨俄而大雨驟至溪澗盈溢將

士喜謂吉必見原策竟殺之俄失其
屍周遊吳魏間又百餘年乃仙去

宮

嵩

琅邪人師事于吉隨吉於曲陽泉上遇天仙
授吉青縑朱字太平經十部吉併以付嵩其

書多論陰陽否泰分天道地道人道云嘗服
雲母數百歲有童子色後入紵嶼山仙去

晉

鮑

靚

東海人字太玄學兼內外明天又河洛書稍
遷南陽中部都尉爲南海太守嘗行部入海

遇風饑甚取白石煮食之以自濟靚
嘗見仙人陰君授道訣百餘歲卒

王仲倫

衛國人初入少室山學道常往來鳴石山愛
其響輒留聽太康中進士田宣隱於岩下常

拊石自娛每見一人白衣道冠徘徊岩上及晚方去
翌日宣令人於岩下擊石而潛於岩上伺之俄而果
來執袂詰之因自言其詳乃求問養生訣惟畱一石
如雀卵去時凌空冉冉入烟霧宣得石舍之輒百日
不饑

賀

樂

莊平人官水部郎與葛稚川善得導引之術
一日至驪山白鹿觀井中見金蝦蟆口出五

色光樂曰此肉芝也餌之入費蒙
山不返今莊平有賀樂店是也

魏夫人

任城人司徒魏舒女也性樂神仙味真慕道
服胡麻散茯苓丸吐納攝生常欲別居閒處

父母不許年二十四強適南陽劉幼彥生二子子息
粗立乃離隔室宇齋於別寢有清虛真人王君與羣
仙來降授以太上寶文經守靜之思與日俱進在世
八十三年以成帝咸和九年托形化去證位爲紫虛

元君領上真司
命南嶽夫人

羊

權

字道興泰山人羊忱少子居茅山得道有九
嶷山仙女羅郁顏色絕世穆帝昇平三年降

權丹室贈權浣布巾金玉
條脫各一枚移時而去

元陽子

長白山人於伏生墓中得金碧潛遁之書自
爲註解得還丹訣修真於華陽宮十九年仙

去在山中時人不見其飲食惟晝夜
燃香不用火發以氣呵之香達城市

蘭

公

曲阜人有孝行忽斗中真人降其舍自稱孝
弟王曰吾自上清托化人間示陳孝弟之義

子真誠不昧當授以秘旨勉力行之蘭公承獲妙訣
領悟真機嘗與里人共遊郊野見古冢三公曰此三
仙解化之墳第一冢有真人仙骨今已復形是爲地
仙長生久視第二冢仙衣一具道經一函其人方如

醉卧發之良久乃能話言此以太陰鍊形綿養真氣者第三家有玉液金丹服之便當冲舉並發之一如所言公因披仙衣吸金丹捧道經招卧冢二真人起同躡層雲冉冉而去衆羅拜問何時再降公曰但施行孝道自當衛爾無日不降也言訖不見

盧童子

黃縣人幼有至性九歲離俗居縣西南廬山辟穀導引後騎白鶴昇仙唐時封冲禧真君

李道空

陽信人常遊濟兗間冬夏一衲衣三十年不易人有所詢但以指示之病者求醫則張目

呵噓可治則付以藥不可治則示以期

陳仲舉

膠人學黃老術却粒服氣隱大珠山之石室時人莫知其歲數仙蹟尚存

石坦

字洪孫北海劇人居無定所不娶妻不營生衣敝食粗陶然自得人有喪葬輒策杖弔之

無遠近寒暑或同日同時衆咸見焉
始知其爲仙也姚萇之亂莫知所終

竺法太

東莞人道教魁梧湛深禪學時領軍王洽東
亭王珣太傅謝安咸敬禮之臨寂預示其期

以太元十二年卒于精舍

竺道生

魏姓鉅野人生而穎悟師事竺法太年十五
便登講座吐納問辨雖名宿莫敢抗至具戒

器鑒日深太祖設會下食良久衆疑日晚帝曰始可
中耳生日曰麗天天言中即中矣徑取鉢食衆咸服
其樞機得乘後於虎邱山聚石爲徒講涅槃經至闡
提有佛性處曰如我說契佛心否羣石爲之點頭又
說法於金陵天雨曼陀
羅花至今名雨花臺

南北朝

張忠

中山人字巨和隱於泰山常穴居清虛服氣符堅聞其賢徵至長安以野法見乞還餘齒

歸岱宗堅以安車送之至華山而逝諡曰安道先生

慧重

閔姓魯郡人僑居金陵南宋孝武帝大明六年勅於新安寺出家秉性清徹機悟深沉言

不經營應時若渴爲禪宗所推仰

僧鍾

孫姓魯郡人年十六出家志識宏遠嘗至壽春導公見而奇之言於譙郡王鄴畱具供養

每有講論尊公爲之讓席後止中興寺永明初魏使李道固來聘帝以鍾有德聲勅與酬對往復論辨言無偶失南北重之

道敬

琅邪王氏凝之之孫從遠公出家每歎戒律終身難全願淨六根但稟一戒以爲得度之

要遠公許之篤志念佛早夜勿替宋永初元年端坐唱贊而逝衆見光明滿室移時方滅

普明

張姓臨淄人時誦法華維摩二經有別衣別座未嘗混雜嘗見普賢乘象至其前授以神

咒救病輒痊宋孝建中卒於大明寺

僧巖

北海人寥廓靡常人不能測劉善長爲青州欲舉爲秀才拂衣而去後爲沙門栖遲山谷

常以一壺自隨一日爲弟子曰吾今夕當死壺中大錢一千以通九泉之語蠟燭一挺以照七尺之軀至夜而亡時人以爲知命

智順

徐姓琅邪人年十五出家師事智度受戒具陶鍊衆經而獨步於涅槃透論貫徹徒衆嘗

數百人齊竟陵王創寺居之至梁天監六年跣逝

竺朗

京兆人少事佛圖澄碩學淵通尤明氣緯隱於泰山之琅瑯谷因謂之朗公谷秦苻堅欽

其德行元魏太祖亦遣使致書以繪素旃罽銀鉢爲禮後燕慕容德師事居給以兩縣租稅谷中舊多虎朗居之處志遂絕秦書曰朗嘗與隱士張巨和遊張常穴居而朗大起殿舍連樓累閣雖素飾不同並以靜外致稱年八十而終

僧意

竺朗弟子貞確有思力每登座講說輒天花下散將終見一沙彌現形云天帝請師講經

沐浴端坐而逝

法定

梵僧也魏正光初來遊方山見希有如來曾於此成道遂經營梵宇有一蛇引道二虎負

經白兔元鶴之異遐邇助工於是窮岩絕谷化爲寶坊勒賜名靈巖寺

惠

始

清河人張姓少詣長安師鳩摩羅什觀習經典坐禪於白渠北晝則入城聽講夕則還處

靜坐時趺行履泥初不汙足色愈鮮白世謂之白脚佛太延中寂化齋潔端坐停十餘日容色如一衆神

異之

隋

由吾道榮

琅邪人少爲道士常遊燕趙間聞晉陽有異人精於法術遂往訪之得其傳凡符水

禁咒陰陽律數無不通解後隱於琅邪山辟穀餌松朮以求長生之秘隋開皇初拜諫議大夫若辭歸卒

年八十五今鄆城馬陵山有由吾仙洞

徐

則

東海郛人沈靜寡欲懷栖隱之操初居縉雲山後入天臺絕穀養性所資惟松水而已雖

隆冬沍寒不服綿絮年八十一赴晉王廣之召王請受道法徐辭以時日不便後一夕卒王遣人送柩至天臺徐徒步而歸至其舊居取經書道法分遺弟子然後跨石梁而去須臾柩至方知其靈化王聞而益異之

李清

益都人世傳染業少學道多延方士開皇四年嘗入雲門山遇仙人授書一軸立談甫半

日歸視城郭人民已非舊日訪其子孫皆云自入南山未歸時唐高宗永徽元年開所授書皆小兒醫方也自是逸遊名山莫知所終

慧藏

姓郝趙國平棘人十一歲出家年四十乃潛於嵒山木食山漿澄心玄典研窮雖廣而以

華嚴爲本宗初北齊主武成降書邀請於大極殿開講華嚴至大業元年年八十四卒

法安

鼓姓安定鵠狐人少出家太白山九龍精舍開皇中晉王召住慧目寺及從駕幸泰山帝

道渴安以刀刺石出水帝飲之而甘乃於朗公谷建神通寺初安與晉王入谷見一僧著敝衣乘白衛而

來安禮之甚恭王問何人安曰斯朗公也將創造神通故來規度爾寺既建即勅安住持年九十八而終

法瓚

齊州人初隱於泰山之阜開皇十四年帝東巡狩招訪名德下勅延之命住京師勝光寺

後送舍利於神通寺役旋而終

胡燦

沂水人本韋姓仁壽初詔送舍利於蔣州樓霞寺遍訪江表叢林得經一百餘卷併前錄

所遺及諸缺本於是到處傳寫北方諸乘始完

僧世

青州人住興善寺仁壽初送舍利於萊州弘藏寺役旋又送舍利於密州茂勝寺行達青

州宿道藏寺是夜赤光從房內出直指東南及造石
函忽變爲赤金如棗如豆餘悉變爲青琉璃圖表以
進帝大悅還
京無疾而逝

法

楷

青州人師習涅槃通解詞義受具後遍遊名山入京師住揚化寺宣揚戒律宗風大振仁

壽初送舍利於曹州寶粟寺建塔諦銘感徵最盛

曇

觀

莒人七歲入禪欣慕法宇仁壽初奉勅送舍利於定林寺初停公館即放大寶光掘地得

銅浮屠一枚制同神造用以安盛舍利恪得相容

唐

保恭

青州人本崔姓幼年入道晚而愈精自陳隋以來南北無不欽仰武帝初年八十而卒葬

長安東郊詔秘書
監蕭德言撰碑

王遠知

琅邪人母畫夢鳳集其身因有娠生遠知少警悟陶弘景度爲道士投法籙隋煬帝作玉

清元壇以處之貞觀九年詔潤州即荊山爲觀俾養真其中後謂弟子潘師正曰吾少時誤損一童子吻不得白日昇天今召署少室伯將行即沐浴加冠而逝高宗追諡昇玄先生又詳方伎

于茲仙翁

姓李名元枝字甘美居泗水之南天花橋少讀書年五十餘應舉獲第已而棄家遊

黃山西峪得道家書結茅於鄒平之于茲山貞觀四年仙去初隱其姓名因山有姜石晴則乾雨則濕乃姓姜名澤字仙露脫凡之日謂山下行人曰我于茲道人也今山上釣臺石屋遺蹟尚有邑人設祠祀之

周季道

號紫陽真人遊費蒙山遇羨門子乘白鶴執羽扇玉女侍從季道叩乞長生訣羨門子曰

爾名已在丹臺石室之中何憂不仙
但攝靜以俟之遠涉江湖來此何索

王希夷

滕人隱嵩山師黃頤學養生四十年更居徂
徕山喜讀周易老子餌松柏葉雜花年七十

餘筋力柔強玄宗東巡召見行在
時年九十餘拜國子博士聽還山

張道通

齊人天寶時栖息於東莞織女山洞
中年三百歲人作迎仙觀於其下

蕭靜之

蘭陵人舉進士不第性好道絕粒鍊氣結廬
漳水之上十餘年而貌悴髮落引鏡而怒因

遷邨下逐市人求什一之利資用豐足乃置地葺居
掘得一物類人手肥而潤色微紅嘆曰太歲之神將
為祟耶遂烹而食之適月而貌復少壯一道士顧而
駭曰子必嘗餌仙藥求眡其脉乃曰子所食肉芝也
生於地類人手肥潤而紅得食者壽同龜鶴然當深
隱山林更期至道不可自囿於塵濁之間靜之果如

其言捨家而去不知所終

徐釣者

不知其名自言東海蓬萊鄉人常擢舟泛於鄂渚上及三湘下經五湖每將魚市酒人逐

之不可近乃水仙也嘗吟詩云曾見秦皇駕石橋海神忙更漲驚潮蓬萊隔海雖難到直上三清却不遙

董京威

即衡陽董鍊師也初在蒙山修道杜甫贈詩所云故人昔隱東蒙峯

劉棟

淄州人養母甚孝所居臨河一旦忽扶其母登山是夕大水平地丈餘人始異之其後去

城數里作窟室以居別築小室以奉其母朝暮出視母履膳訖復還窟默坐如是十餘年士大夫欲見者

入窟室中相對不交一談問亦不答但云速修速修而已母卒營葬畢棄家去不知所往

道因

濮陽人甫七歲詣靈巖寺落髮聽講不決旬通涅槃經衆駭嘆以爲神悟久之杖錫出山

避亂三蜀居多寶寺宣諭維摩聽者數千人後赴京
師止大慈恩寺玄奘法師等具來詣訪仍著涅槃華
嚴伽章疏
數千言

黑虎禪師

不知何處人居萊山麓下築洞演法太宗
東征過其洞有二黑虎當道車馬莫能近

禪師呵之使去因詔問東征之事禪師對曰
決勝果如其言凱旋爲建禪寺賜名真定

道哲

臨邑人初隱終南駱谷山履雪空巖彈指覺
悟後遷住京師大莊嚴寺道行益高貞觀九

年化去年七十有二所撰有百識觀門十
卷智照自體論大乘聞思錄等書傳於世

明淨

高密人自少出家南遊天臺山日至村中乞
食回值羣虎閑目開口若饑餒狀乃以匙抄

飯納虎口中大小均徧日復如是貞觀三年召至京
師值大旱命祈雨甘霖立沛獲大有年後住義勝寺

莫知
所終

道寂

俗名李仁萬齊州正覺寺都維僧來居長白山修營寺宇入都上表請額時上大興佛教

有三藏淨義法師居大薦寺演律譯經勅道寂勘校因賜新譯諸品經文還寺開堂宣暢之次遂致感應東巖醴泉出病者飲之即愈表上中宗勅賜名醴泉寺及師宗寂乃知爲梁寶誌公後身也開元中有碑記碑陰鐫刻誌公像

光寶

井州人初謁荷澤神會禪師闢析同異超然頓悟居於沂之蒙山元和二年圓寂

惟政

本周姓平原人勤行不息妙契上乘文宗嘗食蛤蜊蚶中有菩薩形象召惟政問之請立觀

音像以荅殊休武宗
即位入終南山隱寂

臨濟

俗名邢義元南華人初同睦州在黃巖坐得佛法大意後往鎮州臨濟院即名臨濟和

尚遠近來參者惟示以耕魔揀異之旨會趙州遊方到院彼此對質應機了悟懿宗咸通八年示寂傳其

法者凡十六宗
皆號臨濟法嗣

趙州和尚

俗名郝從諗曹州人師事南泉受成後遍歷諸方嘗謂七歲兒童勝我者我師之百

歲老翁不及我者我教之住趙州東觀音院四十年人皆稱趙州和尚乾寧四年將示寂謂弟子曰吾徒化後不用淨淘舍利身已
是幻舍利何生趺坐而逝

五代

楊仙公

淄齊間道士莫知其年歲時遊行於市或就鐵鋪借鐵椎自擊其頂或令人用石擊其腰

背雖盡力終無所損入山與虎豹爲戲狎之如鷺雛後唐長興中入蜀峨眉山不返

樹

王

不知其名居嶧之滄浪西龍門觀中草衣木食四時常棲樹間人呼爲樹王同時有李先

生者亦居此觀踪跡靈異里人不知樹王行事惟李先生數數稱之晉天福間二人俱羽化去

華蓋真人

劉姓蜀人居勞山龐眉皓髮面如渥丹故衣掩形不冠不履世稱華蓋真人忽一夕

尸解而去矣

義

楚

裴姓相州安陽人七歲來歷下後覽大藏慨儒家與佛教文多謬解事多誤用擬白樂天

六帖纂釋氏義理庶事羣品以類相從建立門目計五十部隨事別列四百四十門周顯德元年進呈世

宗勅付史館賜紫衣仍加號明教禪師至宋開寶終

子

鄰

范姓兗州人其父見僧必吐唾而子鄰性慕之已而辭母投東都廣愛寺為僧後十年省

親歸則其父喪明母亡已三載矣子鄰誓願報母乃詣泰山祠誦法華經三轉又往鄆山禮阿育王塔設四萬拜求母得度忽空中有呼子鄰聲仰視之則母在雲氣中曰仗佛慈悲已生忒利天矣

宋

賀元

琅邪人得道不死真宗東封謁於道左曰晉水部員外郎賀元再拜而去後熙寧時有道

士喬全與蕪載為友一日辭去曰賀元期我於蒙山也載有寄賀詩云舊聞父老晉郎官已作飛騰變化

看聞道東蒙有居處願供菽水看燒丹按晉有賀樂莊平人官水部郎時謂即其人也

甄棲貞

字道淵單父人舉進士不第初訪道於勞山華蓋真人久之入建隆觀為道士後遇許元

陽投鍊形養元訣二三年漸返童顏登高躡危輕若
飛舉乾興元年謂其徒曰此歲之暮吾當逝矣即日
焚殯室室成不食月餘衣紙衣卧磚榻卒人未之奇
也及歲久形如生衆始驚傳以爲尸解棲真自號神
光子與隱人海蟾子者以詩往還論
養生秘術目曰還金篇凡有兩卷

靳八公

長清人以鬻酒爲業有一道者屢至其家公
出醇酒飲之酩酊而去不知其爲仙也後復

至稱有篤疾卧其家疾涎嘔穢索麵湯食之公家偶
乏道者於葫蘆內取麵付之遂爲湯道者食畢留餞
餘不潔八公妻取而投之於火公亟奪而食之道者
即偕八公登東山而去其妻泣而隨之道者草書十
字遺之世傳以爲號咷歸別處結
緣便飛雲石刻遲賢亭詳古蹟下

黃冠道人

姓氏里居不傳熙寧間以醫遊於楚邱素
堠村不事方劑但令病者見之一與之語

即愈居數月
忽不知所在

劉野夫

青州人有道術嘗約友人龔德莊曰今夕家

自門起德莊同家人犯烈焰出四傍皆僨異日野夫
來曰君家人幸出可賀也宋政和間寓興居寺人計
其壽已一百
四十五歲矣

王老志

濮州人遇異人於丐中自言吾鍾離先生也
予之丹服之而狂遂棄妻子結廬田間時爲

人言休咎政和間召至京師進絨書一封帝啓之乃
昔歲秋中與劉喬二妃燕好語由是信之封爲洞微
先生久之托疾歸未
幾卒詔贈正議大夫

魏二翁

雷澤人遇異人得道手持蒲笈語禍福多奇
驗一夕盜將竊其衣物得伺於外二翁呼其

名使來欲與之盜驚逸而去徽宗遣使徵之笑曰
是以我爲林靈素也留頌武彝一章置几上而逃

賈文

疏成公臨沂人幼慕道教政和間嘗遇純陽
子與之遊自後能洞知休咎上召見賜以紫

衣後歸蒙山之陽建宇集徒年七十四一旦
羣鶴集庭乃仙化去今祠在蒙山玉虛觀

高尚處士

劉姓濱州人性穎慧幼有高真之色長通
儒書及二氏法一日遇異人授以養生秘

訣遂不語結廬然坐爲寶以通蔬水政和間賜錢三
百貫加號高尚處士其後靖康盜起凡經其居者無

敢驚擾後
尸解而去

靳用章

字民之須城人聞濱州有高尚處士師事之
道成命弟子繪其像既畢撫掌笑絕越數日

啓手足有異香
屬續若空衣然

侯谷神

沂州道士貌古形臞慕神仙之術一日鵲衣道者入觀中授九藥一粒命谷神呪之年八

十五羽
化去

吳守一

蘭陵人早爲道士從湖默劉真人受鍊度秘術入鄉邪神峯山辟穀數年忽有一道者入

廬與語袖出茶烹而飲之道者出戶遂失所在吳年
至九十餘羽化之時異香滿室白鶴遠空者移日

雪竇禪師

趙州人俗名李重顯自幼出家遍叅名宿駐錫四明雪竇山發願建立道場趺坐窮

岩誦經不輟有山鹿啣花野猿設供之異旬日之間
布施雲集構成賜額明覺寺詔移住鄉邪山興復資

聖禪院廣延法嗣身披一布衫五十年不易皇祐七
年示寂戒其徒闍毘舍利仍送歸雪竇薌林師嘗作

雪竇布衫偈云趙州無義漢雪竇
老婆禪一川風雨後明月獨當天

郭里店僧

博州郭里店有僧道其名閉關參悟戒行甚高嘉祐八年正月二十一日仁宗夢一

僧類古阿羅漢狀謁帝曰我博州郭里店院中僧也未有當今額特來請賜帝覺而異之訪得其寺賜額

慈覺

文幼

淄川人字夙悟博通經律尤精百法論所至爲徒衆講解重修經藏補諸經之缺明道二

年受具足戒嘉祐五年賜紫方袍元豐三年示寂於明水鎮之惠覺院

文宗

王姓登州人幼年出家投延洪院傳大乘戒開演法華修恒圓滿藏宗每宣入內殿對御

講經賜紫金衣加號禪鑑大師

曉

初

登州人住辛山白雲資慶院爲維那僧善奉佛乞有真武像朝夕頂禮山臨海島有郡武

軍周應等乘間謀劫晚初跌生底真武告之曰巡司設伏以待應等被擒事聞特勅改資慶為真武院并賜初紫衣號真應大師

道

楷

在姓沂州人與洞山雲禪師俱為青原法嗣而楷更精進大觀初賜紫方袍不受號定照

禪師政和八年作偈而逝偈曰吾年七十六世緣今已足生不愛天堂死不怕地獄撒手橫行三界外騰騰任運無拘束

法

寧

李姓莒縣人初依沂州天寧妙空和尚參侍既久盡得雲門宗旨後住沂之淨居寺開揚

真諦尋南遊至松江華亭縣之青龍鎮有章氏母夢天人告以古佛來鎮翌日師至乃建剎居之仍名淨居寺紹興間沐浴端坐而逝

普

和之蒙陰人自幼爲僧即異於衆及長有戒行蒙

蟒俯首隨和至一石穴潛伏其中志遂絕年六十餘

跌坐而逝今石穴尚在每春夏則巨蟒蜿蜒可見人之爭睹

金

劉志堅

蒲臺人幼年入道師濱州高尚處士功行甚

紫衣加號洞真大法師

薛玄微

濱州人生有慧識年十四投高尚觀禮師歷

昌二年有人見於泰山下與語若生平又二年復由東平府舟運珉石至觀中而去人因勒銘紀其仙蹟

唐仙姑

姑餘山人幼有慧悟十歲入烟霞觀修鍊十
三道成有同里王處一來師事之姑曰我非

汝師也數日後汝師當來已而重陽子至王處一與
丘處機等七人奉以爲師姑辭去即羽化今清風嶺

有石廟錫像
併志在壁

王重陽

陝西盤屋人天眷中東遊海上往來東牟嘗
棲息於修真觀味道探玄牖廼後進王王陽

等七真皆師事之
爲仙家北宗之祖

馬丹陽

初名從義改名鉅字元寶先世陝西扶風人
徙居寧海弱冠能詩舉進士大定間遇重陽

子授以仙術專務清淨遊關西徧覽名勝東歸道經
芝陽山愛其巖壑清邃環堵爲修煉之所後羽化於

萊陽遊仙宮加號丹陽
順化真人爲七真之首

孫不二

馬丹陽之婦也丹陽既師重陽婦亦預聞至道詣金蓮堂出家大定十五年居洛陽之風

仙姑洞越八年壬寅十二月二十九日卓午沐浴更衣書卜筮子祠端坐而化時丹陽居遊仙宮忽拂衣

起舞謂門人曰孫姑已仙去矣明年春洛陽信至時日不爽

譚處端

寧海人初名王字伯玉少感風痺疾詣北斗經求濟大定中往師王重陽冬夜藉以海藻

不勝其寒重陽展一足令處端抱之汗出如置身甌中黎明以盥手水滌其面宿疾頓廖心知重陽爲異人誠心事之得其道要一日遇吳六酒肆書龜蛇二字於壁是夕四鄰大燼無遺而酒肆獨完人皆異之元至元六年贈長春雲水蘊德真人

劉處玄

東萊人字通妙師事重陽子得其傳自註黃庭道德清淨諸經玄旨秘與人不能喻至元

六年贈長生輔
化明德真人

王玉陽

東牟人名處一遇重陽子授道法三十六卷修真於崑崙山之烟霞洞嘗臨危崖翹足駐

立人目爲跌脚仙人承安中召見問先生事能前知何也對曰鏡明自能鑑物此在自已之靈明耳興定

未蛻逝至元中贈玉
陽體玄廣度真人

郝廣寧

寧海人初名大通隱於卜筮後從重陽子學道修真崑崙山年七十三羽化元至元中贈

廣寧通玄太古真人所著有太古集太易圖及示教真言行世以上六人並丘長春爲北宋七真長春

詳元
代下

靈源姑

諱志稱唐括夫人嚮慕真風耽味玄理大定壬寅春馬丹陽行化過濰姑徑往叅禮畧聆

道妙是年十月親詣崑崙山復於丹陽前懸祈要訣
丹陽作滿庭芳詞授之得聞清心鍊息之義還離
庵以居幅巾麻衣甘食粗糲盡屏塵務專志頭真終
以勤苦得成示期仙化詞有石刻刻在離之玉清宮

中

任風子

黃縣人狀貌奇異師事馬丹陽修煉於萊陽
之迎仙觀氣體充粹寒暑不侵人以休咎叩

之發言有驗大
定間端坐而逝

劉德仁

樂陵人讀書稍通大義一日遇老叟授以道
德要言併投筆一枝而去自是玄學頓進大

定初迎住京城天長觀賜號東岳真人
元至元中贈無憂普濟開明洞微真人

汪仙翁

單父惠冲素好道大定間有藍縷道人自稱
汪姓來止其家冲供養無缺忽一日發狂奔

墜城南井中拯之已死冲厚葬之逾月有人自汴京來云汪先生寄書致意冲以爲紹已置書擔陳不發明年居室毀於火書獨無恙冲乃發書視之始知爲純陽吕仙翁也開冢啓棺已空空矣世傳四月十四日乃仙翁誕辰至期伺之有白鶴翔空之異

楊真人

不知何處人栖真於青縣之白雲岩大定中白日冲舉後人於揚州見之寄還石像數龕

張信真

樂安人世以農桑爲業母嘗夢一馭鶴仙人而娠六歲讀書聰悟過人泰和初年十五從

父叅禮大通爲師戒行精嚴祛邪治病大有靈異後於天長觀見天師授正乙盟威秘籙賜號真人年五十五歲當晝凌空而去

郭志空

章丘人別號超然嘗遇異人傳授秘法逆長坐不卧吐納運氣或化爲靈風或涎爲玉液

欽定四庫全書

卷三十

章宗時召見賜金冠
錦服道號長春真人

李 笈

濟南人慕臨安山水之勝往遊焉憩淨慈寺見青衣道人林下劖筍笈揖而問焉道人曰

爾來可共食因燃火燒之笈食之甚美道人忽不見笈自覺身輕不復飲食後入青城山乘雲仙去

李 頤真

昌邑人仕爲武畧將軍性好道棄官隱於青石山名其園曰歲寒庵日守休值劉長生過

其園以瓜穀題石壁曰
過仙園字至今不滅

披雲真人

平度人年十二從劉長生學道天性敏慧道行淑真後羽化於終南山偈曰喝散迷

雲驪回宿霧萬法無私千峯獨
步其徒以事聞詔贈披雲真人

寶峯僧

嶧人楊姓名守忠出家爲寶峯寺僧有戒行杖錫遊諸名山多所證悟及老退居寶峯一

日登生自鳴曰六十九年如掣電臨行爲君通一線翻身跳出萬重關驚起泥牛耕海向端坐而逝

教

亨

字虛明任城人先是有汴僧福安居任城寶相寺倚樹而化亨其後身也人皆呼爲安山

主年十三受戒具師事鄭州普照寶和尚苦行有年一日於雲堂聞打板聲霍然證入遂呈偈曰日月面流出流星閃電若更遲疑面門着箭咄寶公深契之後出世五坐道場詔住慶壽寺復主少林法席興定已卯寂逝闍維時焰如蓮花目睛不壞兒時圓珠隱額至是燦然飛去

元

丘處機

棲霞人號長春子兒時有相者謂其當爲神仙宗伯年十九修全真學于崑崙山師事王

重陽爲七真之最太祖特詔求之乃與弟子同往雪山見太祖大悅每言欲一天下者必在乎不嗜殺人

及問爲治之方則對以敬天愛民爲本問長生之道則告以清心寡慾爲要太祖深契之歲乙酉熒惑犯尾其占在燕禱之即退舍會旱祈雨期以三日應果驗詔改其居爲長春宮賜號無爲演道大宗師

尹志平

字太和丘長春弟子住濰之玉清宮長春應召侍行者十八人尹居其首太祖問道者三

微言啓沃詔賜清和演道玄德真人撰述甚多提拔後學今玉清宮有清和仙跡碑

范常真

平度州人丘長春弟子住州之上清觀境有狼噬人常真默咒遣之人因稱爲狼范後尸

去解

李志常

觀城人母夢神人授以玉兔覺而有娠及誕瑞光照室異香遠聞長師丘長春學修煉法

後世祖遣使召至大都命爲大濟度宗師住長春觀一日忽見五色雲從東來亟召徒衆屬以後事端坐

化而

何道柔

河間景州人年十五出家爲道士遇異人指以海上七真宜師事之乃周遊寧海登萊雲

光望仙諸處得與長春諸真人相印證乃浩然而歸聚徒河北名流皆宗仰之

戴元歆

修道於東蒙岩穴中得養生訣兼精祈禱之術世祖召見賜紫衣加號冲寂大師知蒙山

玉虛觀事

楊道真

沂州人嘗仕宋爲縣令聞符籙之敗知宋運將終乃棄官爲道士遍歷蜀廣閬隴之地參

悟頗有所得至元二十年至嶧州青檀山尸解詔贈通元希妙大師

雲岳子

博州人名劉志堅少事永昌王凡使命多任之有劉使臣之稱感異夢棄家入道拜郭志

空爲師篤行不倦居鰲山二十年屢著
靈異號募即墨之華棲山凌烟峒中

真成子

沂州人俗名我體元師事馬丹陽受修真之
要性醇古簡淡薄覽羣書尤精於老莊居嶧

之清真觀至元間召見殿庭
賜紫金襴加號中真大師

張仙公

日照人十歲即知慕道十四歲入朝元觀爲
道士精修數十年大德五年元旦忽有白雲

繞庭鳴鶴羣舞仙公即化去今昇
仙橋是其遺蹟也號永壽真人

馬靈真

滕縣人又名了道師事馬丹陽弟子雷洪陽
得丹陽正派游至雪山見洞谷幽奇遂結廬

於旁服氣導引後形解仙去其徒即於其地翔雲
萬壽宮號丹陽洞同時羽人有王志專號清明子張
志廣號清虛子楊志清賜號希丘真人張志靜賜號
淵靜大師張志玉賜號通真大師皆滕人也或師洪

陽或師靈真皆
栖止洞之左右

張志純

泰安州人號天倪子居嶽麓會真宮道行超羣賜號崇真保德大師授紫服郡人王天挺

贊之曰冰霜外潔日星內炳又曰山澤之臞道德之腴化時年一百二十歲

徐世隆

東平人嘗賦詩哭文文山棄官入道往來泰山與天倪子遊叅叩玄要能逆觀未然天順

間復至岱下惟升玄觀一老道士識之其容貌如兒時所見云

王嘉祿

新城人少入勞山遇道士教以五禽之術久遂不食但以石爲飯或食松柏葉渴則飲澗

水久之遍身生毛寸許一日思其母歸復火食毛盡落然食石如故嘗囊石自隨映日視之即辨其味著齒無聲如粉粢糕餌後母死復入勞山遂不知所終

何老

新城人縣東六七里有一茅庵何老修行於此獨居數十年每夜焚香誦經即有蛇虎來

相拱護庵後有積水灣曰
參龍池相傳何老擾龍處

葆光子

郭姓章丘人居城北女郎山之三陽洞學鍊神服氣之術自號葆光子後仙去

郝志隆

滕縣人嘗因莘仲舊觀經營爲道院未集而尸解羽化之夕月色如晝祥風慶雲由西北

而來冉冉從東南去萬目共觀弟
子劉志淵竟其事改觀曰太清觀

鹿茂之

泰安州人初業儒後以黃冠隱卜築於徂徠山之二聖宮味老氏言晚而玩易題其所居

曰貧樂巖曰演易齋示期羽
化長清杜仁傑爲之誤碑

李堅

號麻衣先生來遊長清嘗以藥濟人或預告人休咎無不驗年逾百歲一日過石澗店謂

人曰某日吾葬
此至期果化去

張

仙

招遠人初爲傭耘田若有神助後居羅山燈
草澗絕穀茹松柏飲水三年竟蛻化於羅峯

頂絕

王仙姑

招遠人居縣南十五里日樵於野不採而薪
自集後卒於樵所鄉人掘地將埋之得石櫛

題曰仙姑之墓遂納
之於櫛立祠祀焉

周祖師

招遠人世居埠頭村其父周太公入螺山採
木忽澗旁聞兒啼聲視之見一虎在兒旁逐

之虎忽不見抱兒歸育之年十二始能言仍往螺
山學道其後與唐公郎公化公志公張公廖公同日

舉昇

陳僧

不知何處人煉丹於安東衛之阿掖山石洞中後破壁飛去今名陳僧洞以志其仙蹟云

天和子

徐姓膠州人嘗師李靈山得秘傳元統間隱居即墨鶴山修煉功成順帝召見賜紫欄衣

入明莫知所終

周真人

黃縣人年十五投道士陸翁爲師不藉言詮別有慧悟己而爲陸所逐夜卧澗側有虎擁

衛其旁陸知之轉拜周爲師越數年同遊名山莫知其跡

廣恩

賈姓順德涪水人夙有慧根至元初祝髮爲開元寺僧遊歷名山叅訪禪旨後居臨清淨

土寺戒行精嚴傳法甚廣元帥路通深敬信之至元中贈護國興理大師寶法宗菩薩

志德

劉姓東昌聊城人年十二出家受戒具至二十盡得秘乘世祖召見辨難不絀賜紫方袍

使主天禧旌忠二制三十年一履一衲敝弗易也一夕夢梵僧高座上散花如雨遂覺悟因示微疾跏趺坐而化年八十八歲闍維時舍利無算詔建塔藏之學士趙孟頫為銘

正寶

俗名趙譚長山人投廣教禪院仁公薙髮苦行焚修無所開悟乃遍歷齊魯燕趙擇師訪

友元貞丙申至五臺值太后駕謁文殊東臺現圓光異相南臺碑版光鑑岩谷寶視之心地頓開歸而成道大德三年欽授帝師法號

大行

齊州人入泰山草衣木食行法華三昧感普多現身遂覺心眼洞明見十方諸佛猶如明

鏡中像至元間詔入宮闕詔賜號開國法師帝精進菩薩

普喜

未詳何郡人身偉而黑如梵僧狀德行高邁精究宗旨至元二十五年初立江淮御講之

所詔師主鎮江普照寺後示寂茶毘舍利無數高僧傳稱曰吉祥佛山東人也

辯和尚

不知何處人嘗至青州創普照寺世稱青州辯和尚禪教盛行北方二百餘年燕秦齊魯

之間入是宗者皆其法嗣有青州百問一卷

海印

泰安州人居鄒縣大明禪院功深悟道一日謂弟子曰吾幻身非久住世親書偈畢端坐

而逝

善道

臨淄人入大藏信手探卷得無量壽佛經及住廬山觀遠公道獨豁然增思後遁跡終南

又往晉陽從綽禪師授經入定七日洞見本來一日謂徒衆曰吾明日歸去至日中誦佛而逝

明

僧一庵

北直懷來人元末卓錫於萊之大澤山叅契真詮授徒甚衆洪武初一日示期登座對衆

說偈曰生本無生滅本無滅太
空浮雲洪爐點雪言訖而逝

通大師

夏姓名不詳洪武間嘗往來於單父鄉鎮間春
夏耕鋤喜爲人力作不受值人皆愛之久之

往來行人見遠近傭力者皆若僧也衆悉驚異僧遂
去居曹之九塚寺願瞻殿廡顏甚願新之乃杖錫行
丐至濟河側有木長數丈徑尺餘就商易之商曰汝
能肩之吾即施汝僧謝訖以錫扣者三肩之而歸未
嘗輟步今梁眷通木懔即其木也
寺工成又杖錫而去不知所之

禧果

壽光人八歲隨元兵至沙漠投金山寺依僧
勝迪迪甚器重之已而勝迪死南還洪武十

九年上半年召見畫策定建左賜脊甚厚後與法弟禧海
偕遊至濟南住正覺寺永樂元年移住棲霞法勝庵

持行清嚴老而彌
篤年九十歲坐逝

麻衣仙

趙姓名不傳冬夏常衣麻因呼爲麻衣趙洪武中隱膠州大珠山石室辟穀得仙今有朝

陽庵
遺蹟

去留馨

范姓膠州人自幼好道遇異人授以辟穀導引之術身輕如葉行住處異香襲人人因稱

爲去留馨終日行歌於
市洪武中乘雲仙去

鞠思

游僧不知何許人永樂間居文登灣東寺或禪坐累日或日歷數山學士與之遊講論風

生能以符水濟人又精堅白同異之術
年八十餘一日整衣冠而卒顏色不變

繼達

田姓膠州人自幼出家戒律精進妖婦唐賽兒聞其名不敢入州境膠人賴之一夕跏坐

化去

張三丰

本貴州黃平人永樂間來隱青州雲門洞修煉不出一日往遊勞山居民蘊現禮之甚恭

三丰取擔頭耐冬花一枝挿現庭前枝葉菁蔥經霜愈茂至正月花發清艷不凡分枝移之輒萎死蓋海

上仙葩也按三丰一名張躡躅嘗考黃平州志在三丰禮斗臺註云山東平州人元末遣戍於此又嘗

見三丰墨跡題曰
晉陵未詳孰是

史老

嘉祥人宣德間修道焦城之牛山小洞中有巨蛇護其洞口山下平疇數頃募人種粟收

獲洞內每逢雨雪輒取飼羣鳥一日下山謂人曰吾爲某醫牛去去輒不返蛇亦無跡後有人見於太和

山中旋失去不知所之
今山下田猶名史老灣

海上老人

不知姓名自言海州人也生元至正甲辰至成化癸卯年一百二十歲嘗師異人得

攝形鍊氣之要白髮被額顏色如童來居濟寧辟穀導引日惟啖棗數枚或菜數莖飲水少許而已憲宗召見時館指揮王瑄家遂稱王士能數對稱旨賜寶鏤遣歸諸公問所以壽對曰無術也第不茹葷不娶妻不識數不爭氣爾既還居濟十餘年去遊海上不知所終

鞏道巖

滋陽人元劉長生弟子成化中居三清萬壽觀一夕有神降童子曰亟掃殿內明午八仙

至道巖異之次早潛匿三清供桌下日停午果有乞丐八人入殿內望三清拱手道巖趨出跪懇仙術因授書一卷而去道巖習之能呼風喚雨拘役龍雷後以搬運術授其徒吳道人吳嘗修天仙宮一切匠役工價令各隨地自檢所得銀錢正償其值其神異如此道巖逝既久究人或在淮揚間遇之始知其仙也

何志嶠

恩州人童時淳樸禮南昌劉仙為師遂隱盤山棲雲巖一日忽仙去遺書示弟子曰吉人

為善惟日不足凶人為不善亦惟日不足

藍縷道人

不知姓氏成化間寓萊之凝祥觀終日取爐灰和成丸積之座隅一日辭衆曰來春

此地人疫得吾灰丸可救遂去不知所之次年春果疫服丸即愈

李守真

滕縣人少遊勞山遇異人授以修鍊之術還隱雪山屢著靈異成化間徵至京師授太常

博士不拜詔居顯佑宮勘校道藏主持法籙二年遷還山許之賜號冲虛妙悟太極涵真子李隱仙

任山

范縣人少好學過目成誦年十七忽棄儒為酒家傭遇純陽呂翁授導引法乃修鍊於安

平鎮之顯惠廟或行歌於市或醉卧冰雪中人呼為任風子弘治甲子冬蛻化廟中今迎仙坊昇仙橋皆

其遺跡也

趙天雷

弘治中修真於長清之洞真觀得正乙法勘攝符咒試之皆驗會歲旱禱於南山日久不

雨邑令憾之天雷呼童子至前掌中書一雷字遣下山霹靂自手中發大雨如注邑人異之因名其山曰

雷山遺有風雷雨三碑禱雨輒應洞真觀一名神虛宮觀之東曰仙人臺即天雷羽化處也

李子真

濮州人通政著之子正德辛未著知平涼府子真隨之任遇洪道士授以異術一日子真

月下閉門卧隣人張氏見子真行焚葦上迫視之不見及門子真方睡熟未起越數年羽化葬之日郡人

宋某見子真跨白驢西去

元凝子

高密人年十三牧豕海上有道士佩劍過與藥一丸赤如火吞之即隨道士去入青城山

白龍洞洞前積雪三四尺凝處之若溫時敲冰濯足
洞中戲折澗竹竅而吹之作鳳凰鳴未幾道士去獨
處洞中一日斲芝巖下遇一白虎握其尾躍上虎脊
走里許舍去嘗往來吳越間人問姓名不答迫之以
指就索書元疑二字題詩贈人運筆如飛字類雲書
鬼篆多不可識後道士復會偕入瑯琊山不知所終

張道人

不知何處人自言姓張來住勞山上清宮貌
如少壯而歷叙所經皆百年以上事人未之

信一日募修東嶽廟需石灰數千觔急切不能辦張
募之某發婦家婦以貧辭張曰汝家門前槐樹旁有
灰三千觔何云無也發之果如其言或問何以知之
張笑曰渠先祖建樓所餘吾見之其家不知也凡事
頗能前知有問
之者佯狂不答

仙桐道人

嘉靖初有道士遊曹州定清寺敝衣垢面
恒如醉狂寺有枯桐爲僧所伐止存朽根

道人撫摩之喚水者三跌坐根上曰此樹再生僧衆莫顧也至夜半聞歌曰木有根兮真可惜上天下地游八極詰旦視之已失所在越三日枯根頓發逾月枝葉扶疎經年圍至五六尺矣不詳其名謂之仙桐道人

牛

仙

不知姓名卜居文登東南平山之陽棲息茅廬中冬夏不易衣出騎一青牛居山常數日

不舉火製丹成山前遂產薇薇取汁和丹服之與一童子俱飛去其牛飲薇遺汁亦隨仙去山人稱爲牛仙因以名其山

要

子

幼從師修真於登郡之萬壽宮遇異人止宮之室師不爲禮私食之異人授以術點鐵成

金師覺異人邀去要子沐浴趺坐而化遺一履是日城西三十里有人見其赤一足逐一驚行曰煩寄吾

師吾尋異
人去矣

蕭道士

萊陽人純謹無異能但禱雨輒驗一旦端坐逝是日有鄉人如城者遇之塗問何往日遊

勞山至城知
蕭已逝矣

赤脚王

王姓不知所自碧目蒼顏常戴一笠非布非絨其光如漆製式甚古云是始冠時物嘗於

文登爲人力田隆冬不履踏冰上如平地其行若飛奔馬不能及問以長生則厲色嗔詞俚不可解八九十老人言童時嘗見其貌正如今日嬰兒痼疾撫摩即愈有調笑下其裳者童身稚膚實全真子也人欲師事之已逝去以其四時徒跣故號赤脚王云

顛倒李

萊陽李氏子少遇異人得仙術遂徭狂棄家嘗依郭外墓所晝乞於市夜豎雙足於樹上

而首向下因稱爲顛倒李後過吳沽河遇羣盜盜戲問之李曰爾輩死期至矣盜怒詰之曰爾何時死曰即死羣盜毆斃之沙洲中無何官兵追盜擒之居人舁李屍具棺葬沽水側後有見之者發墓唯空棺云

李真人

不知何處人住平度雲臺觀日久後坐化石岩下經二十餘年皮骨不朽尚書趙煥題曰

李真人
蟬蛻處

斑仙

名全真居招遠螺山最高峯石洞曉險人跡罕到黃邑一孝廉應公車斑與別曰公此行

必捷南宮令某邑余當過而問焉孝廉行後一日斑集常供薪米者數十人告之曰余當去矣洞中數年無以爲報惟祈諸公以清淨爲心不爭爲福言畢逝人遂葬之山上孝廉果成進士授令兩月斑造訪焉盤桓數日辭歸迨入覲過里始知斑久化去開壙視祇空棺雙履而已後建祠山巔曰覺觀名其洞曰斑

洞仙

柏

顛

新城人幼不娶薄遊江湖三十年有異術能於暗中嘘氣作光巨石數十人莫能動者輒

手移之難過其前則命之舞又能使人作異夢開斗室中燒丹未及期而母啓之鼎遂焚柏驚仆其旁既甦乃顛後不知其所往

于半仙

居淄川城西冶頭店性質樸無偽家有鐵拐仙人畫像于日具香紙齋奉閱數歲常蚤起

赴縣役天尚昧中途見一人宛然所供畫像曰非吾李仙師乎遂懇切求度曰汝隨我行慎勿開目須臾至一處開目視之則波濤拍天浩無畔岸乃東海濱也驚怖告歸乃與之金旬日抵家年至九十無疾而終因謂之半仙

勞山道士

即墨勞山中多一二百歲人高密張生讀書道觀觀有老道士形容怪醜執樵蘇之

役張意忽之一日張爲其徒說易道士聽外呼曰君所述皆俗說試叩之名理出人意表生受其學遂以

說易擅
東方

許朴

濮州人得辟穀術數日不飲食顏色如常栖東阿山中譚大司馬聘至京與語不合辭之

歸曰翁老而面赤好動健於房慾必有授以吐納之術者晚起試看溺器中涸汁是遺精也恐一旦火發救之遲耳後數月譚卒朴入山愈深不知所終

王勅

字雲芝歷城人嘗讀書卧牛山寺見火光發之得異書勅中夜焚香展誦能通天徹地御

風出神知未來休咎所在多奇蹟焉

楊生

歷城諸生喜談神仙居龍山鎮兒夜啼生剪
然爲二月口吹上昇使二月相闕娛兒以止

啼百里內皆見之巡撫某知爲仙術秘訪之間尚有
別術否生舉所繫茶潑之塔前水暴長若降雨然呼
以仙師送之歸後數日復訪
之已攜妻子去不知所之

馬真一

初居華山人於弘正間見之已百數十歲萬
歷末遊遼左天啓乙丑來登州栖遲十餘年

預識却變多
隱語皆後驗

籙冠子

自名九一崇禎甲戌栖息於曹之天齊廟手
註陰符道德清淨三經明白簡易牽鑿爲之

一廊已而知難將作扶
之入勞山不知所終

隋仙姑

萊陽丁氏婦持齋誦經萬志清修崇禎甲申
正月十六日至灰村南三里許小山之陽曰

此余歸真處也娶薪爲堆姑登其上囑衆舉火莫與之燃乃環步數匝後登上蟠膝坐未幾火起衣燼不

灰髮如卷雲香
露騰空而逝

張真子

莫詳里居常往來萊陽灰村已而卜靜於菴
薩頂石室中凡三年一夕囑守菴道士勿耐

睡夜半風作山壁震響道人驚詰已失真子所在但有詩留石壁云孤峯雲擁舊茅堂二百餘年借此鄉
今夜乘風入瑤島碧桃開處姓名香龍飛甲申
二月上旬二百五十二歲松華道人張真子題

雪 簾

不知何許人浪遊東土自號雪簾人目爲吳
人佯應之好談玄理嗜酒飲無算贈以錢物

衣履遇貧者即與之醉輒箕踞嘲罵王公落
落不可一世詩尚豪放善作大字磨濃湍數升信手揮成矯
健有勢今雲門山有大壽字在峭壁上迺古軼倫
一絃琴世無傳者惟簾能譜之後去不知所終

蓮 菴

始業農十八歲披剃於掖之資聖寺閉關二十年常入靜見水波盈前詔其弟子曰速掃

除天將雨矣時烈日中天不移時即大雨如注年九十結跏而逝

文 淨

濟寧人目有異光能讀經閣室中參證微言神悟妙蹟號無塵上人嘗靜坐主默能前知

扣之多不答問出一二語必奇中人咸異之後於普照寺建萬佛閣勅賜藏經度閣上閣東一室結跏其

中或日一攝食或三五日閉關不通飲食純修三十年正德中預示化期沐浴端逝僧臘九十年矣

知 永

陽信人有戒行爲僧衆所推城南十里有大蛇當道行者患之永向前以手按蛇蛇乘風

去飛

寶 燈

東阿楊氏子也二十出家居城北香山寺參禪誦經頗通內典持行清苦時刻不懈壽九

十四歲一日沐
浴更衣而逝

湧空禪師

俗姓趙名天得字禮之宣府世將也征戰有功累官遊擊將軍崇禎改元棄職歸沙

門駐錫新城南關之萬佛堂茅椽僅足容膝師閉關結趺寒暑不易對人無言有問者但云念佛好三字

庚辰臘
月寂化

遊僧

崇禎十一年在南糧船中行至臨清忽下岸向人言曰世間好事焚修第一人問其姓名

不答隨走至白家園內夜端坐口鼻出火自焚遍體金色擎之有聲一州之人皆拜禮焉隨埋之即其處

築土山高三丈許建
菩薩殿奉香火不絕

皇清

金邦寧

滋陽羽士素居三元廟虔誦太上真經年六旬餘一日忽徧辭鄰里曰上帝召我某日當

永別矣或笑其狂惑至期果沐浴更衣捧經持杖端坐而逝五月不仆遠近觀者如市

趙來祥

直隸廣平人住新城縣北關真武廟五十餘年持行勤苦每夕誦經有巨蟒伏門外如聽

經狀聞鐘魚聲輒至誦畢道人必施食馴擾之人以爲清修所致康熙間生逝

大空

德州人居街河西五里觀音庵碌碌未顯中年歲走五臺參禪憬然有悟精修戒行時舉般

若秘義以示人人不之解也順治五年元旦雪初霽村人見庵前無行跡啓戶視之跌坐禪床玉筯雙垂

至地觀者咸瞻禮讚頌之

道忒

廣東人初投青州府法慶寺爲僧法號木陳堅持戒律派衍臨濟正宗後住四明之天童

山開堂說法弟子常至千人順治間
詔賜紫衣加號弘覺禪師

寶

如東文登人于姓子銳志修行契心內典叅報恩
蓮柏山諸名者得臨濟宗旨成大知識順

治十三年振錄還東建法源禪院於黃縣
之小河登壇說戒紹續薪燈有語錄三卷

普慶庵老僧

庵在博山縣城內原係孫氏香火院僧
修持無別長惟朝夕誦佛聲千句一日

早起沐浴更衣呼侍者曰好語主人吾去矣遂趺坐
而逝壁間有一偈云這個臭皮袋撒下無罣碍洪爐
烈焰中明月清風在惜亡其名

祖

珍卓錫秦山西麓之普照寺不言所自息影禪
廬聚經典數千卷澄思密探徹悟真宗栖遲

於巖色溪聲之間心迹雙清儵然自遠寺前一石題
之曰界塵石名流往訪咸比之遠公蓮社云年七十

去餘化

觀

公

明季隱者問其姓名不答一日題詩有觀公二字人以是呼之其學浩博無涯陰陽醫卜

靡不精妙偶至費縣之其山見古寺頽廢遂卓錫山下風雨虎狼莫能侵害人異之共爲結庵身實心空所得愈進臨寂自寫其像合掌端坐而逝有語錄一卷存於寺

山東通志卷三十

欽定四庫全書

山東通志卷三十一

方伎志

流寓附

道體事而無不在修齊治平廣大悉備而旁及方
技亦有陰陽變化之理默蘊潛通妙秘囊中巧出
意表此星數醫卜之術所以各有專家也齊魯藝
成之士歷代多有而舊志所載無幾今茲增輯亦
約而不繁豈非以語怪徵神技成則賤固非碩學

通人之所宜枉轡者乎流寓向有另志爰以帙簡而附之夫寓於物與寓於地一也驚曲藝者勿畔於經滯羈旅者不忘其本百慮而一致君子正樂觀其通矣作方技志

方技總述

按舊志所載自三代以迄有明僅二十八人然如師襄師曠名著於經而不能詳其

貫飛衛輪扁本子書之寓言而不能覈其實謹刪之而取紀傳之有徵者以補其數且視舊志加增焉仍

以時統之不分載郡邑

周

師涓

衛人公族子師其官也昔師延爲紂作靡靡之樂武王伐紂師延東走自投濮水而死後

衛靈公將之晉設舍於濮水之上夜聞新聲召師涓受之涓乃造新曲以代古樂春有離鴻去雁應蘋之歌夏有明晨焦泉流金之調秋有商風白雲落葉吹蓬之曲冬有凝河流陰沉雲之操

墨子

名翟宋人魯公輸般爲楚造雲梯以攻宋墨子詣楚見般而說之曰子爲雲梯以攻宋宋

何罪之有於是解帶爲城以幪爲械令般設攻城之機九變而九拒之般以告楚王乃不攻宋翟後入周狄山精思道法聞山間誦書聲其夜有神人來以衣覆其足授素書二十五篇至漢武帝時遣使聘之不出見其顏色尚如五十許人

公輸子

魯公族名班或作般季氏之母死將飲般請以機封孔子曰般爾以人之母嘗巧乎故孟

子曰公輸子之乃後人祀爲匠氏之師今長清縣有班仙洞

梓

慎

魯大夫精於占候昭公十八年夏五月火始昏見丙子風梓慎曰是謂融風火之始也七

日其火作乎戊寅風甚壬午火甚宋衛陳鄭皆火梓慎登大庭氏之庫以望之曰此宋衛陳鄭四國也不數日四國皆來告灾

瓠

巴

魯人學琴於師襄業成鼓瑟而游魚出聽

薛

燭

薛人善相劍客遊於越越王勾踐有寶劍五聞於諸侯召燭相之燭引據原本論列精與

越王悅之問何以守此劍燭曰在人不在劍也王能以愛劍者愛人則寶過於劍矣越王稱善乃招致賢

士遂滅吳稱霸

扁鵲

渤海人姓秦名越人少時遇長桑君傳以禁方出懷中藥予鵲飲是以上池之水三十日

視病盡見五臟癥結特以診脈爲名耳嘗治虢太子復生天下盡以鵲爲能生死人鵲曰越人非能生死人也此自當生者越人能使之起耳魏文侯問鵲曰子昆弟三人孰最善醫鵲曰長兄最善仲兄次之扁鵲爲下長兄於病視神未有形而除之故名不出於家仲兄治病在毫毛故名不出於閭若扁鵲者鑱血脈投毒藥副肌膚間而名出聞於諸侯矣文侯曰善所著內經九卷外經十三卷楊子法言云鵲盧人也而醫多虛故世有盧醫之目今歷城城北有鵲山鵲湖皆其故蹟

雍門子周

齊人以琴見孟嘗君孟嘗君曰先生鼓琴亦能令文悲乎雍門子周曰臣所能夫角

帝而困秦者君也南面而伐楚者亦君也以秦楚之強而報仇於弱薛猶磨蕭斧而伐朝菌千秋萬歲之

後廟堂不血食矣高堂既以傾曲池又以平墳墓生
荆棘狐狸穴其中遊兒牧豎躑躅而歌其上曰孟嘗
君之尊貴亦猶若是乎孟嘗君喟然太息涕淚承睫
而未隕於是雍門子周援琴而鼓之徐動宮徵微揮
羽角終而成曲孟嘗君涕泗增歎而就之
曰先生鼓琴乃能令文立若亡色之人也

漢

王仲

琅邪不其人好道術明天文濟北王興居反
欲委兵師仲仲推驗天象深知不可乃脫身

浮海東奔樂浪山中
後興居敗乃得免

公乘陽慶

臨淄人精於醫嘗遇異人授以黃帝扁鵲
之脈書診病知人生死決嫌疑定可否及

論藥性甚精年七十無子
授同里淳于意盡得其傳

淳于意

臨淄人少習醫術自謂能得妙悟聞公乘陽慶有異授乃師事之陽慶曰盡棄爾故所習

方悉以所傳者授之三年而學成爲人治病決生死多驗意嘗爲太倉長故又號倉公云

趙彥

琅邪人少有學術延熹初琅邪賊勞丙與泰山賊公孫無忌結連寇徐兗間上遼南陽宗

資爲中郎將督州郡合兵討之彥爲陳孤虛之法以賊屯在莒莒有五陽之地宜發五陽郡兵從孤擊虛以討之資具以狀聞詔遣五陽兵到彥推遁甲教以時進兵一戰破賊徐兗二州以安

單

賜

湖陸人善明天官算術熹平中黃龍見譙告橋元曰其國當有王者興不五十年龍當復

見此其應也至建安二十五年春黃龍復見譙其冬魏受禪

周惇

平原人建安末避地遊廬陵吳孫權延參軍謀言多奇中權在豫章有星變以問惇惇曰

災在丹陽權曰何如惇曰客勝主人當即日有所聞矣言未畢果以邊洪之亂告警悉如惇言精於諸術而不欲以術顯尤兼醫道乃復推驗方書脉訣著書五千餘言

三國

周宣

樂安人字孔和善占夢為郡吏太守楊沛夢人曰八月一日曹公當至必與君杖飲以藥

酒使宣占之是時黃巾賊起宣對曰夫杖起弱者藥治人病八月一日賊必除滅至期賊果破宣之飲夢

凡此類十中八九世以此建平之相

管輅

平原人字公明幼喜仰觀天文常云家雞野鵲猶尚知時況于人乎及長明周易凡風角

占相之道無不精微占候奇中不能殫述安平趙孔曜薦輅于冀州刺史裴徽曰輅雅性寬大與世無忌

衍觀天文則同妙甘公石中俯覽周易則齊思季主
今明使君方垂神幽藪留精九韋輅宜蒙陰和之應
得及羽儀之時徽于是辟爲文學從事正始元年舉
秀才正元二年謂弟辰曰夫與我才名不與我年壽
恐四十七八間不見女嫁兒娶婦也是
歲八月爲少府丞明年卒年四十八

晉

江

瓊

濟陽人少與從兄應元受學于衛覬古篆之
法倉雅方言說文之義當時並收美譽而瓊之

官至太子洗馬後避亂居涼土世傳家學至六世孫
式元魏延昌中官符節令篆體尤工表請撰集古今

文字四
十卷

淳于智

濟北盧人字叔平有思義能易筮厭勝之術
高平劉柔夜卧鼠齧其左手手指以問智智

乃以朱書手腕橫丈後三寸作田字辟方一寸二分使露手以卧旦有大鼠伏死手前燕人夏侯藻母病詣智卜忽有一狐當門向之嗥藻怖愕馳見智智曰其禍甚急君速歸在狐嗥處拊心啼哭令家人驚怪大小必出一人忽出哭勿止藻如其言家人畢集病母亦出視所居堂屋拉然而崩張劬母病篤智使市沐猴繫母臂令人撻拍恒使作聲三日放去劬從之其猴出門即爲犬所咋死母病遂差上黨鮑瑗家多喪病貧苦會智來應詹謂曰此君寒士每多屯虞君試爲一卦智布卦成謂瑗曰安宅失宜故致困君舍東北有大桑樹君經至市有一人持荆馬鞭者便就買以懸此樹三年當暴得財瑗承言詣市果得馬鞭懸之三年後升得錢數十萬銅錢器復二十餘萬以是致贍其占驗神異類如此

黃

泓 斤邱人父沈善天文秘術泓從父受業精妙
喻 深歸燕慕容瑰爲參軍說成敗事皆如言

官太史令以老
歸年九十七卒

呂

忱

任城人工書篆表上字林六卷江式謂其附
托許慎說文而按偶章句隱別古籀奇惑之

字文得正隸不差篆意也忱弟靜別放
故左校令李登聲類之法作韵集五卷

北魏

成公興

膠東人山居隱逸希在人間精九章要術殷
紹嘗師事之同時有道人法穆居長廣東山

亦以九章
數學擅名

李亮

陽平館陶人少學醫術就沙門僧坦研習衆
方畧盡其術鍼灸授藥莫不有效徐克之間

多所救恤四方疾苦不遠千里竟往從之亮大爲聽
事以舍病人其仁厚如此官府叅軍督護本郡子修

亦遵父業仕至中散令遷給事中太和中常禁內
高祖文明太后時有不豫修持鍼藥治多有效賞賜
累加集諸學士撰藥
方百餘卷行于世

徐 審

東莞人字成伯與兄文伯皆善醫藥慕容白
曜平東陽獲之表送京師顯祖欲驗其所能

乃置諸病人于幕中使審隔而脉之深得病形兼知
色候遂被寵遇官中散後以治高祖疾有救攝危篤
之功進鴻臚卿金鄉縣開國伯審常有藥餌
及衣服道符年垂八十鬢髮不白延昌初卒

王 顯

陽平樂平人精醫術初文昭皇太后之懷世
宗也夢爲日所逐化而爲龍而達后后寤而

驚悸遂感心疾召徐審與顯診之審曰微風入藏宜
進湯加鍼顯曰案三脉非有心疾似是懷孕生男之

象果如顯言累官至御史中尉封衛南伯世宗
詔顯撰藥方三十五卷頒布天下以療諸疾

崔

或

東武城人字文若少嘗詣青州逢隱沙門教以素問九卷及甲乙遂善醫術官至寧遠

將軍性仁恕見疾苦好與治之廣教門生令多療其弟子清河趙約勃海郝文法之徒咸亦有名或子

景哲亦以醫術知名為司徒長史並稱職

沈法會

兗州人工隸書與濟陽江式齊名

北齊

徐之才

寒兄文伯之孫也善醫術藥石多效又闢涉經史發言辨捷天統四年官尚書左僕射時

武城酒色過度恍惚不恒會病發自云初見空中有五物物稍近變成一美婦人去地數丈亭亭而立食頃變為觀世音之才云此色欲多大虛所致即處湯方服一劑便覺稍遠又復還變五色物數劑疾竟愈

方術明悟奇驗不能殫述年八十卒贈司徒公錄尚書事諡曰文

吳遵世

渤海人少學易入恒山從隱居道士遊處數年忽見一老翁謂之云授君開心符遵世跪

取吞之遂明占候以易筮知名世祖以丞相在京師居守自致猜疑甚懷憂懼謀將起兵每宿令遵世筮之遵世云不須起動自有大慶俄而趙郡王奉太后令以遺詔追世祖及即祚授遵世中書舍人固辭疾著易林雜占百餘卷

隋

乙佛弘禮

貝州高唐人善相術煬帝居藩召見與語輒驗及即位使弘禮總攝諸術家常以直

言獻規帝不之悟尋以病乞歸

唐

王遠

知琅邪人少警敏多通書傳師事陶弘景得其術高祖微時遠知密語天命武德中平王世

充秦王與房元齡微服過之遠知未識也迎語曰中有聖人非王乎乃諗以實遠知曰方為太平天子願自愛太宗立欲官之若辭貞觀九年詔潤州即茅山為觀俾居之卒年百二十六歲遺令子紹業曰爾年六十五見天子七十見女君調露中紹業表其言高宗召見嗟賞追贈遠知為大中大夫諡升真先生武后時復召見皆如其言又贈金紫光祿大夫天壽中改諡升玄

許雲封

任城人樂工之選者貞元初韋應物自蘭臺郎出為和州牧夜泊霞壁驛忽聞遠聲酷似

天寶中梨園法曲召問之乃李暮外孫許雲封也雲封自叙天寶改元初生一月值東封駕回次任城外

祖抱詣學士李白命今名十歲入長安外祖教以蓮
每曲成必撫背賞嘆遂隸梨園小部後逐離亂漂流
南海近四十載今將抵龍邱訪親故至此應物曰吾
有乳母之子其名千金嘗於天寶中受蓮李供奉藝
成身死每所悲嗟舊吹之蓮即李君所遺因檢囊出
示雲封跪對悲切撫而觀之曰信佳蓮但非外祖所
吹者因謂韋曰竹生雲夢之南鑒在柯亭之下以今
年七月望前生明年七月望前伐過期不伐則其音
實未期而伐則其音浮浮者外澤中乾乾者受氣不
全氣不全則其竹天凡發揚一聲出入九息古之至
音者一疊十二節一節十二鼓今之名樂也其已天
之竹過至音必破所以知非外祖所吹韋曰欲信女
鑒蓮雖破無傷雲封乃奉蓮吹六州遍一疊未盡
劃然中裂韋驚嘆久之厚爲之禮且延之曲部

宋

楊

知

陽信人少穎悟遇異人授以風鑑之術太宗微時塗遇知知驚拜曰君其治世主乎太宗

超避之及登極詔號冲穆真人建觀於泰山後莫知所之

王

訥

陽信人精星歷太宗時王贊寧充史館編修壽八十矣訥推其命孤薄無貴壽訥謂寧曰

君生時其有青星臨乎寧曰信然予母言生時有顯者避雨于門其神驗有如此

錢

乙

郢州人善醫官翰林醫學皇子病瘰癧乙進黃土湯而愈神宗問其故對曰以土勝水水

得其平則風自正帝說擢大醫丞賜金紫由是公卿宗戚家延致無虛日活人不可枚舉乙本有羸疾自以意治之嘆曰此所謂周痺也入藏者死吾能移之使在末因自製藥日夜飲之左手足忽掣不能用喜曰可矣既而得茯苓大如斗以法啖之盡由是雖偏廢而風骨悍堅如金人乙為方不新斯古法時度越

縱舍卒與法會

辛年八十二

趙鎗

益都人精眼科人以趙光明稱之潛心醫典洞豁至理對疾察脉應驗如神

王起陽

益都人學皇極經世書天文地理星緯諸家研心考究占驗無不奇中嘗編竹作渾天儀

璣衡旋轉一如銅蓋識者鑒之

金

紀天錫

字齊卿泰安州人早棄進士業醫學精於其使嘗註難經五卷大定中授醫學博士

元

李浩

滕縣人世以儒顯而浩兼治方術精醫學常往來東平間爲人治病率神効所著有素問

鈞元仲景或問諸書皆甚精確實文正熙幼從其子
元學薦之於朝世祖徵之以衰老甚不就詔有司歲
給衣米
終其身

蕭炳

峯州人精於醫於書無所不讀取本草藥名
以四聲相從作爲五卷以便討閱蓋前人所

未有
者

李國用

登州人能望氣占休咎兼精相術洞視人五
臟嘗遊杭州於帥府席間遇趙孟頫方志風

瘡滿面國用遙望之曰過江來僅見此人瘡
愈即面君矣官至列卿名聞四海後如其言

郭翁

曹州人以賣卜南遊定遠有富人女贅而卜
所偶翁占之曰此貴人也當在腹請娶之期卜

年而生
子興

冷超巖

登州人寫真能逼肖至正間嘗寫順帝容稱旨賜絳衣擢秘書監號曰一手先生

明

渠仲寧

滕縣人常遇異人授相地術語多奇中成祖召見試之用量天尺度地指一處言下若干

尺有石如虎狀發之果驗授本科訓術

王賢

字惟善寧陽人幼遇異人授以青囊書遂精其術永樂中為成祖卜壽陵後累官至順天

府尹

王延年

字童侶淄川諸生工書畫潑墨淋漓意到筆隨有天然之趣賞識者謂與吳小山伯仲云

李第

長山人能相人知貴賤廉介有節操嘗遇異人得黃白術子孫求其傳執拒之曰人富則

侈侈則忘其性之所所有吾
不傳者蓋爲爾等免禍也

劉嘉謨

字南川新城人十餘歲好讀古今醫書不能

訣誦之忽一人衣冠偉麗入問所讀何書曰脉訣曰
解否曰不解也曰吾甚喜女不以不解爲解也逐一
開示劉竟了然雨止其人忽不見
自是胗疾無不立效遂成名醫

江左彥

字有月其先飲人父客遊濟寧遂占籍焉左
彥敏慧便捷擅三倉之學尤工鐵筆能鐫晶

玉入妙稱終技里人
楊鳧岫作歌以紀之

劉濱

長清人天順時客遊都門善畫終南進士請
乞甚衆每寫時必閉戶對鏡披袍持笏盤旋

舞躍審勢既定而後落筆高麗使臣必
購覓以爲歸贄俗因呼爲劉鍾馗云

尹林菴

濟南人常遊長白山遇異人授以方書遂洞醫理活人無算

劉夢松

字崑石陽信歲貢先是濟南醫士尹林菴登長白山得異人秘授名馳天下夢松就學盡

得其傳沉疴痼疾應手而愈爲德藩名醫

周宗嶽

濱州人業儒兼治醫道聞尹林菴得異人授與陽信劉夢松皆執贊事之惟宗嶽事尹最

久得其傳更深所著有脉學講義

高晷

益都人性淳樸常以利物存心因學醫受異人術造詣精明求療者門無虛日尤精傷寒

鈐法時刻不爽所著有鈐法書二卷

范進

字柳溪濟寧人工行草楷隸書無不精妙畫葡萄更擅名不同凡品今舊者有存者

華鰲

章邱人御史珩孫也以繪事著名每落筆輒先題咏其上自譜曰空塵詩畫故人皆稱之

曰華空塵

釋湛池

字還無濟寧人功行最高尤精醫術證治不用古方別有刀圭於鍼灸疽瘍取效神速謝

遺一無所受惟食一齋

靳尚才

平陰人貢士以醫馳名巡按過平陰訪之尚才診視良久曰目下無病十日後當失血恐

道遠不及侍從調藥數劑以備之後果如其言服其所遺之藥一劑而愈

丁應震

字陽東平陰人博學能文兼通醫理有東阿人暴病而亡隔一日胸猶溫微動急迎應震

視之曰是痰壅氣噪針其動處調藥灌數匙其人獲甦

張德潤

字良玉濟寧人妙解律呂遨遊四方以琴名於世嘉靖中與臨清謝榛並客趙藩名重當

時著有琴譜九還操一曲備七調又有依山樵唱詞世爭傳習之

周允元

字雲衢濟寧人善楷隸工繪畫山水常摹沈石田筆幾亂其真晚修三一養生之術年至

百歲

司軻

陽信人精醫術按脉察病治無不效濟北賴之

朱皓

濟寧人自稱一廬山人博學嗜古落拓不羈工於繪事常折花燈下摹其影又以髮髻羽

蟲視其翮飛之勢又卧東籬下累日圖名菊百種見者無不稱絕

吳南陽

東阿人字龍灣幼讀書通經術精醫學謂人曰吾胸中一片活人心也遂著南陽活人書

脉經圖說岐黃家寶之嘉靖中一吏部郎赴京舟過安平鎮病暈目不能言南陽診之曰無他中半夏毒耳問素嗜何物對曰嗜食鵝鵪南陽曰鵝鵪食半夏中毒何疑更以薑汁一盞飲之而愈酬以五十金不受曰吾志在活人不在金也

韓應奎

益都人精於醫宗東垣一書得其數要所治無不效

杜世威

章邱人有異術能號召鬼神驅邪祛祟當事者屢試其術頗驗欲薦之朝堅辭獲免

郭羽士

歷城五龍潭住持自言江右人萬歷戊午歲大旱當事者招之募壇禱雨三應時而雨災

泉酒羽士以鐵牌沉之復如初

朱包蒙

萊蕪人肥城所守備嘗蓄心內景素問欣然有所得專治疑難羣醫所束手者然實無古

方成案惟以意求嘗有一老儒迂腐善疑志風塊疑
爲廣毒積憂成疾包蒙投藥發泡其病逆痊或詢其
故曰本非瘡然彼不見瘡形疑未釋也有嬰兒病淋
包蒙令去襪襠立風中以雪沃其足其淋立通諸奇
驗類此年八十餘一日忽語家人
曰吾將逝矣遂飲啖終日夕果卒

侯 鉞

東阿人嘉靖辛丑進士有殊巧工於寫照一
識面即隔數十年能默肖之同年三百人畫

置一小匣後相見即以相示無相違者請告里居一
日行山中遇盜盤其行李而去鉞歸亟圖形以付有
司盡獲之又修元恩橋匠氏以懸立水中難於上石
鉞作天秤於岸轉移甚便又能製兵器火攻之具無
不工巧時
多式法之

崔 勉

東阿人相人奇中嘗過京師大雪飲市樓上
有夫婦二人行丐勉相其夫曰爾貴人當腰

玉復諱視其妻曰因夫人運稍遲故爾探金與之曰他日富貴毋相忘吾崔勉也後十年勉爲滑縣教諭星誤將歸忽對鏡自訝曰吾當復起遂復遊京師計無所出見傳呼過市者視之則向丐者也已掌京營都尉授刺謁相見甚歡壽千金辭不受曰得還吾青瑣足矣乃托主爵者復得唐縣教諭秩滿歸

張惟一

高苑人學道勞山遇異人遂得丹書精於醫能療奇疾同時王名高亦隱乎方術云

張應召

字用之膠州人善畫山水人物萬歷四十三年與師溫如玉同應肅藩之召募臨淳化法

帖凡十二年而成
今帖尾皆敘其名

麻東輝

高唐人醫妙入神能知休咎有臨清副使病令東輝診之曰大人無恙惟公子病當憂時

子在里中亟遣歸視已殮三日矣有少年飲於市肆見東輝來戲之曰吾有病否東輝曰無庸診視爲人

止數日爾少年大怒與之尅期誓生死未及期而少
年以疾卒東輝享盛名不治生產所得金帛盡付酒
家終日在酩酊中
然所醫無不立愈

釋圓明

范縣人生而穎慧度為僧工醫術所治無不
效而日不暇給抵暮歸閒有相延而不及赴

者則坐而假寐病者亦夢圓明至其
病即愈否則危人因以為生死之驗

畢蓋臣

新城人業醫得劉嘉謨之傳其于病也辨南
北審強弱察四時陰陽氣候投一二劑無不

霍然尤精傷寒痘疹視立辨
生死百不爽一崇禎壬午殉難

皇清

翟良

益都人字玉華世居顏神鎮少為諸生好岐
黃術凡施治用古方參以己意投劑輒效順

治戊子
徵詣京師數被燕見尋乞歸遠近造請應手輒愈有餽遺者

輒易藥廣施所著有醫學啓蒙藥性問答
古方講意症疹全編行世郡人建祠祀之

流寓

附

流寓總述

按舊志所載流寓寥寥無幾而中可議者
如陳良陳相之繫於滕臧紇陳完之繫於

齊雖考其跡則是而創推之則指不勝屈矣蓋必其
人與東省有足取重而流連於此或長其子孫或存
其丘隴斑斑可考而後哀聚之使知所本也至於高
賢稅駕信宿宿亦必志其行踪之所自不同於過
都越國者不然齊魯四達之區往來行李豈勝殫述
耶茲不分郡邑而以時統之於簡嚴之中畧寓詳慎
爾

周

陸通

字接輿楚人因辭楚王之聘逃於魯今費縣有接輿村其所居處也

老萊子

楚人有孝行避世不仕耕于蒙山之陽楚王駕至其門曰守國之孤願見先生萊子曰諾

其妻自山間歸訝曰何車轍之衆也老萊子具告之妻曰妾聞可啖以酒肉者可隨以鞭笞可餌以官祿者可隨以斧鉞妾不能爲人所制投其舂鍤而去老萊子從之

范蠡

字少伯楚人仕於越滅吳之後遂扁舟浮海入齊變姓名自號鴟夷子皮耕於海畔居積

致富齊人聞其賢相之蠡曰名久著不祥乃上相印盡散其財於鄰里徙於陶自號陶朱公今定陶縣有

范蠡養魚池

淳于髡

河內人爲齊贅壻遂家於齊滑稽善辯載戰國策及史記滑稽列傳卒葬齊城西四十里

慎到

趙人遊齊與鄒衍田駢之徒號稷下文學士著慎子十一篇卒葬於齊詳陵墓

荀

卿

趙人年五十始遊學於齊時田駢之屬已死卿三爲稷下文學祭酒齊人譏之乃適楚爲

蘭陵令今沂州有荀子宅詳古蹟

漢

李解

苦縣人成子四世孫文帝時爲膠西太傅因家於密

戴德

字延若信都人微時從齊人后蒼得高堂禮經之傳往來齊魯間慕琅邪山水在顏溫里

立書院教授生徒遂名其村爲大戴村所傳之禮爲大戴禮從凡子聖以博士辨論石渠亦受學於后蒼

是為
小戴

嚴光

字子陵會稽人與光武同學及帝即位乃變姓名隱去帝思其賢令物色之後齊國上言

有男子披羊裘釣大澤中帝知為光乃備安車元纁遣使迎之

李善

字次孫南陽清陽人李元蒼頭也建武時元舉家病歿生子續甫數旬家貧鉅萬諸僕謀

殺續以分其財善心惡之而力不能制乃潛負續以逃隱山陽瑕邱界親自哺養備嘗艱辛續雖孩抱奉之不與長君有事必長跪請白而後行續年十歲善與歸本縣條理舊業告諸奴於長吏盡殺之時鍾離意為瑕邱令上言其狀帝乃拜善及續並為太子舍人後善官至九江太守

丁鴻

字孝公潁州定陵人父琳光武功臣封侯卒鴻讓爵於其弟帝不許既葬父乃逃於東海

終焉

梁

鴻

字伯鸞扶風平陵人作五噫之歌章帝聞而召之鴻乃易姓名曰運期耀字侯光與妻子

居齊魯之間久之又適吳

趙

岐

字邠卿京兆長陵人明經術有才藝宦者唐衛瓘之岐逃於北海鬻餅市中安邱人孫嵩

識之我以歸藏匿復壁中著孟子註七篇

范

丹

字史雲陳留外黃人好遠時絕俗爲說激之行桓帝時爲茶蕪長不到官議者以爲侍御

史遂遁去徒行弊服賣卜于梁沛之間有時絕粒時人歌曰甌中生塵范史雲三府累辟不就卒諡貞節

生先

姜肱

字伯淮廣戚人桓帝時中常侍曹節欲借重賢德以釋衆口乃白肱爲太守肱遠遁入齊

居渤海十二年而還

王烈

字彥方太原人以孝義著稱鈞黨時避地北海名行重於閭里有盜牛者被獲曰無令彥

方知也後以黃巾之亂往依遼東公孫瓚數年復歸北海

北魏

劉芳

字伯文彭城人父邕死劉義宣之事芳母子避難入梁鄒城後梁鄒入魏乃北徙爲平齊

民芳雖處窮困而業尚貞固聰敏過人篤志墳典後官至太常卿諡文貞

徐遵明

字子判華陰人年十七遊上黨師屯留王聰受毛詩尚書禮記永安時至平原與田猛畧

就范陽孫買德受業
撰春秋義章三十卷

成

淹

字季文上谷居庸人父洪仕南宋爲撫軍府中兵參軍淹好文學有氣節初亦仕宋後歸

魏官至謁者僕射家於北海

楊

弼

字世弼北平無終人長於吏治仕魏爲輕車將軍後周師入鄴弼隨齊後主南渡留居青

州蓬家焉

溫子昇

字鵬舉太原人家於濟陰熙平初射策高第補御史廣陽王深辟爲郎中齊文惠引爲諮

議參軍濟陽王暉嘗稱江左人文有顏延之謝靈運梁有沈約任昉戎子昇足以凌顏樂謝舍任吐沈云

李渾

字季初趙郡平棘人熙平時官給事中見四方多難求爲征東司馬與河間邢劭北海王

昕俱奉母攜妻子赴青齊未幾而
朱榮入洛衣冠殲盡人以爲知幾

唐

李

白

字太白西蜀人天才英特工詩詞喜任俠因
賀知章守任城遂客遊於兗與孔巢父韓準

裴政陶沔張叔明居徂萊山
日流連詩酒因號竹溪六逸

杜

甫

字少陵襄陽人天資深厚長於詠歌父閑爲
兗州別駕甫因省視來兗後李邕守北海復

來遊齊因流連歷下
所至皆有詩詳藝文

蘓源明

京兆武功人工文章客遊徐兗居萊
蕪山十餘年後舉進士終秘書少監

張建封

字本立鄧州南陽人慕鄒魯之鄉客遊於兗
結廬汶泗間後以功名顯卒贈司徒又詳人

物

王義方

泗州連水人嘗爲侍御史因劾李林甫貶萊州司戶叅軍秩滿授徒於昌樂遂終隱焉所

著有筆海十卷及卒門人貢
半千持服三年又見官績

蕭穎士

字茂挺南梁鄱陽主之七世孫天寶時嘗以秘書省正字奉使括遺書於趙衛間久不報

爲有司所劾遂免官畱濮陽由是尹徵王恒盧異盧士式賈邕趙匡閻士和皆執弟子禮以次授業號蕭

夫子

宋

崔遵度

字堅白江陵人徙家淄川太平興國間舉進士授著作郎歷真仁兩朝累官諭德後使契

丹卒贈工部侍郎有文集三十卷行於世

范仲淹

字希文蘇州人幼孤隨母適長山朱氏讀書長白山之贊堂嶺醴泉寺初名朱說舉進士

乞改今名

蔡元卿

洛陽人祖紹為膠水令遂家焉元卿性好學遠遊至江西請業于胡氏義學五年業成復

歸於齊鄉老諸薦之以學古不合於有司退居淄川隱居自得有豪士願輸錢

畢义林

字蒙士代州雲中人乾德初為觀城令因家焉生子士安真宗時名相詳見人物

劉摯

字莘老東光人幼孤鞠於東平外氏因就學焉至哲宗時官尚書僕射詳見宦績

孫復

字明復平陽人隱於梁父著春秋發微從遊者甚衆

胡

瑗

字翼之泰州海陵人與孫復石介同讀書泰山瑗獨攻苦食淡終夜不寢一坐十年得家

問見上有平安二字不復展視輒投之澗中今泰山有投書澗即瑗讀書處也范仲淹薦之以白衣授校

書郎改湖州教授

穆廷秀

河南人遷居章邱明黃老不樂仕建鄉里稱重熙寧間卒年七十三洛陽王壽卿爲題其

墓

錢

揆

字舜臣臨安人吳越王鏐之後封吳興郡開國侯當知楚邱遂家於曾有子十人皆登顯

仕

李辛

山西樂平人元豐間攜家居費縣之栗林歲饑施粥賑濟村民至今有含飯臺尚存其地

元

許

衡

字仲平河內人金末避居徂徠山後遷泰安之東館鎮扁其齋曰魯齋人因稱爲魯齋先

生世祖召爲京兆提學爲元初儒學名臣

孟

仁

符離人金末寓濟州之魚臺能業儒有節行元帥石天祿禮之辟兼詳議府事後子祺辟

嚴實府僚仁徒東平就養焉

王

磐

字文炳永年人東平帥嚴實興學養士迎磐爲師遂家焉後李璵亦以禮致之及璵將謀

逆磐挈妻子歸東平朝廷知其忠召拜翰林學士卒贈太傅封洛國公諡文忠

胡德安

磁州安定人金末奉其母渡河至東平州總管嚴實知其賢辟掌書記遂家鉅野

閻復

字子靖平陽和州人金末隨父避居高唐遂家焉復穎悟過人讀書過目成誦時嚴實招

諸生肄舉子業復爲首選王磐徵爲翰林應奉累遷學士承旨進平章政事卒諡文康

陳

政

字政之河南考城人金末流寓單州儀家俊偉識量過人元帥阿朮魯異之薦於朝屢以

言稱上意授武德將軍轉嘉議大夫益都路總管及府尹以疾免歸單父屢召不起卒葬城東

張仁義

東安州人金末徙家益都以定河南功授管軍元帥

李庭

本金蒲察氏金末徙壽光改稱李氏至元初以材武累官中書左丞從世祖征乃顏中流

矢裹劍復戰遂擒乃顏遷樞密院封益國公諡武毅

徒單克寧

本名習顯其先金源人後徙置猛安於山東遂占籍於萊之掖克寧資質渾厚寡言

笑善騎射累官
至丞相諡忠烈

滕傑

沛人徙居掖官禮
部郎中以清白著

袁裕

洛陽人幼孤從兄避鞏
管以其兄有鞠育恩推廕兄子爲侍御史

劉秉鈞

字平道相城人徙居東平篤學能文成宗時
官濟兗單三州提舉子獻任長社令後遷淮

東提舉自號峴
山先生葬峴山

宋貴誠

江西吉水人祖信爲至元間宰相以罪貶文
登貴誠於至正二十二年選舉除昭信校尉

般陽路總管府
判官占籍蓬萊

劉思明

字伯庸台州人授承直郎德州同
知致仕慕蓬萊山水因徙家焉

曹安仁

字從義北平人授從仕郎棲霞尹致仕卒於蓬萊因家焉

甯秀

河間人以般陽路總管同知致仕因家於蓬萊

張祐

覃懷人寓居陵縣官至中書省參政封清河公

明

王讓

河南偃師人由洪武甲午鄉薦歷官參政遊穀亭鎮遂家焉子行舉茂才官襄城令子孫

遊庠者甚衆今
爲魚臺望族

李伯徵

徐州沛縣人洪武初避地羊村有司薦舉授新泰縣訓導遂占籍焉

王傑

潁上人正統元年官樂陵令職滿當去邑人士遮道泣留曰侯吾父母也舍是奚之傑亦

泣下遂致仕居於樂陵每朔望邑人士必踵門叩之年九十餘卒

鄭似愚

浙江鄞縣人宋宰相鄭清之後永樂間遊學樂陵慕風土之厚遂家焉

劉盛

字宗茂江西贛縣人遊學德州初從劉摯受經苦志十餘年遂成大儒質樸淡泊隱居

不仕有書說遺稿併詩集行世

蘇文蔚

交趾人宣宗嘉其慕義遠歸授諸城令詔占籍於諸

唐昂

江西人恬淡樂道晚家樂安以孝義著稱

勒士敏

陝西狄道人宣德間由監生任曹縣主簿有惠政民甚愛之遂占籍子璽舉進士

張環

字庭器直隸棗強人景泰中遷居陽信急公好義制行不苟邑人推重舉鄉飲大賓年八

十一歲

成

鑰

字文明山西太谷人天順時以林胥任灝河稅課大使居官勤慎綽有清譽致仕後遂家

於曹積德累仁喜施樂善迨數傳後子姓蕃衍人文蔚起其遷析於齊魯間者皆鑰之苗裔云

王

禮

陝西鳳縣人成化間調萊陽丞在任廉謹卒於官貧不能歸遂家焉子緯領戊午鄉薦

楊

茂

四川人解元進士以耳疾授萊州府教授遂家於掖

李子昌

直隸滄州人以明經任膠州訓導與州人楊可久講學遂占籍於膠

劉世傑

四川人徙居昌樂尋起家南臺監察御史

原

黼

山西陽曲人正德間任觀城令有惠政民甚愛之尋擢知膠州卒於官其子厚扶柩歸里觀民

留其樞養之併爲之卜宅
世居邑之南郭又詳宦績

毛

徵

山西臨汾人原姓王隨父阜徙居
禹城子琦孫九思俱領山東鄉薦

房之騏

字昂若順天人崇禎時給事禮垣以忤權貴
落職後起用督學山左陞布政使以親老乞

養遂占籍益都所著有蒲上閒評
山居雜志掖垣疏稿麟省定諸書

夏允彝

字彝仲南直華亭人爲鄒平都御史張廷登
所鍾愛因攜孥至鄒平讀書三年歸而成進

士官吏部考功主
事後殉甲申之難

滕紹宗

江南江浦人崇禎末任登鎮左營遊擊甲申
棄官僑居福山之成陰舖時山賊竊發紹宗


率練鄉兵資保障焉遂占籍
福山鍵戶課子不復仕進

皇清

王 革

浙之杭州人流寓濟南居濼水之澣名其室曰二十四泉草堂入籍爲諸生成康熙丙戌

進士官成山衛教授以養母乞歸工於吟咏嘗賦詩曰亂泉聲裡誰通履黃葉林間自著書王漁洋司寇亟稱之時有王黃葉之目晚年閉戶耽吟介節彌著門人文登于熙學刻爲二十四泉草堂集行于世



山東通志卷三十一